



KERAJAAN MALAYSIA

PEKELILING PERKHIDMATAN BILANGAN 24 TAHUN 2009

**PEMANJANGAN BANTUAN KHAS KEWANGAN TAHUN 2009
KEPADA PEGAWAI PERKHIDMATAN AWAM PERSEKUTUAN
DALAM KUMPULAN PENGURUSAN DAN PROFESIONAL**

TUJUAN

1. Pekeliling Perkhidmatan ini bertujuan melaksanakan keputusan Kerajaan untuk memanjangkan Bantuan Khas Kewangan bagi tahun 2009 kepada pegawai Perkhidmatan Awam Persekutuan dalam Kumpulan Pengurusan dan Profesional.

LATAR BELAKANG

2. Kerajaan telah memberi Bantuan Khas Kewangan sebanyak RM500.00 kepada pegawai Perkhidmatan Awam dalam Kumpulan Sokongan melalui Pekeliling Perkhidmatan Bilangan 17 Tahun 2009. Sehubungan dengan itu, Kerajaan telah memutuskan supaya Bantuan Khas Kewangan berkenaan dipanjangkan kepada pegawai Perkhidmatan Awam Persekutuan dalam Kumpulan Pengurusan dan Profesional. Bantuan Khas Kewangan ini adalah sebagai tanda keprihatinan dan penghargaan Kerajaan terhadap sumbangan pegawai yang terlibat.

PELAKSANAAN

3. Bantuan Khas Kewangan diberi kepada semua pegawai Perkhidmatan Awam Persekutuan dalam Kumpulan Pengurusan dan Profesional yang berkhidmat pada tahun 2009. Pegawai yang layak dibayar Bantuan Khas Kewangan adalah seperti berikut:

- a. pegawai tetap, sementara, sangkut, sambilan, *contract of service* dan guru sandaran;
- b. pegawai yang bercuti separuh gaji; dan
- c. pegawai *contract of service* yang putus perkhidmatannya selama satu hari sebelum disambung semula perkhidmatan kontraknya.

Pegawai Yang Tidak Layak

4. Pegawai Perkhidmatan Awam Persekutuan dalam Kumpulan Pengurusan dan Profesional yang tidak layak dibayar Bantuan Khas Kewangan adalah seperti berikut:

- a. pegawai yang mengambil cuti tanpa gaji sepanjang tahun 2009;
- b. pegawai yang berkhidmat di agensi yang diasingkan pengurusan saraannya sepanjang tahun 2009;
- c. pegawai yang dipinjamkan ke badan antarabangsa atau syarikat swasta sepanjang tahun 2009;
- d. pegawai yang ditamatkan perkhidmatan demi kepentingan awam atau demi kepentingan perkhidmatan awam dalam tahun 2009;
- e. pegawai yang dikenakan hukuman tatatertib selain daripada hukuman amaran atau amaran keras;
- f. pegawai yang memangku Jawatan Utama/ Gred Khas; dan
- g. pegawai lantikan *contract for service*.

Pegawai Yang Ditangguhkan Pemberian Bantuan Khas Kewangan

5. Pegawai yang ditahan kerja, digantung kerja atau surat pertuduhan telah dikeluarkan oleh Pihak Berkuasa Tatatertib, ditangguhkan pemberian Bantuan Khas

Kewangan. Pegawai hanya layak dibayar Bantuan Khas Kewangan sekiranya Pihak Berkuasa Tatatertib mendapati pegawai tersebut tidak bersalah atau pegawai hanya dikenakan hukuman amaran atau amaran keras.

Kaedah Pembayaran

6. Bantuan Khas Kewangan dibayar kepada pegawai yang berkhidmat pada tahun 2009. Perkiraan Bantuan Khas Kewangan adalah tertakluk kepada genap satu bulan perkhidmatan. Kiraan genap satu bulan perkhidmatan bermaksud satu bulan kalendar.

7. Bantuan Khas Kewangan dibayar pada bulan Disember 2009.

8. Pegawai yang bersara/meninggal dunia/letak jawatan/tamat perkhidmatan/tamat kontrak, perkiraan Bantuan Khas Kewangan adalah secara *proportionate* mengikut genap satu bulan perkhidmatan.

9. Pegawai yang mengambil cuti tanpa gaji/berkhidmat di agensi yang diasingkan pengurusan saraannya/dipinjamkan ke badan antarabangsa atau syarikat swasta tetapi tidak sepanjang tahun, perkiraan Bantuan Khas Kewangan adalah secara *proportionate* mengikut genap satu bulan perkhidmatan.

10. Bagi pegawai sambilan, perkiraan genap satu bulan perkhidmatan adalah dengan syarat mereka bekerja tidak kurang daripada 21 hari dalam sebulan. Sekiranya bilangan hari bekerja dalam sebulan adalah kurang daripada 21 hari, perkiraan bilangan hari bekerja adalah berdasarkan hari bekerja tertinggi dalam bulan berkenaan.

JABATAN YANG MEMBAYAR

11. Bantuan Khas Kewangan adalah menjadi tanggungan jabatan di mana pegawai ditempatkan pada bulan pembayaran atau jabatan terakhir di mana pegawai bertugas.

TARIKH KUAT KUASA

12. Pekeliling Perkhidmatan ini berkuatkuasa mulai tarikh ianya dikeluarkan.

PEMAKAIAN

13. Tertakluk kepada penerimaannya oleh pihak berkuasa masing-masing, Pekeliling Perkhidmatan ini pada keseluruhannya dipanjangkan kepada semua Perkhidmatan Negeri, Pihak Berkuasa Berkanun dan Pihak Berkuasa Tempatan.

“BERKHIDMAT UNTUK NEGARA”



(TAN SRI ISMAIL ADAM)
Ketua Pengarah Perkhidmatan Awam,
Malaysia.

**JABATAN PERKHIDMATAN AWAM
MALAYSIA
PUTRAJAYA**

18 November 2009

Semua Ketua Setiausaha Kementerian
Semua Ketua Jabatan Persekutuan
Semua Y. B. Setiausaha Kerajaan Negeri
Semua Pihak Berkuasa Berkanun
Semua Pihak Berkuasa Tempatan